

四庫全書

集部

欽定四庫全書

集部

雙溪類稿卷二

詳校官庶吉士臣吳烜

主事臣呂雲棟覆勘

總校官進士臣朱銓

校對官學正臣翁樹棠

謄錄監生臣任銜萱

欽定四庫全書

集部四

雙溪類稿

別集類三 宋

提要

臣等謹案雙溪類稿二十七卷宋王炎撰炎字晦叔婺源人乾道五年進士官至軍器少監與淳熙中觀文殿大學士王炎名姓偶同非一人也所著有讀易筆記尚書小傳禮記論語孝經老子解春秋衍義象數稽疑禹貢

辨考工記鄉飲酒儀諸經考疑編年通紀紀
年提要天對解韓柳辨證傷寒論總題曰雙
溪類橐今已無傳惟詩文集僅存仍以雙溪
類橐為名世所行者凡二本一本為康熙中其
族孫琪所刊凡十二卷一即此本乃明萬曆
丙申尚寶司丞王麟得沈一貫家舊本為校
正開雕者也凡賦樂府一卷詩詞九卷文十
七卷炎初與朱子相契朱子集中和炎寄弟

詩有祇今心事同千里靜對簞瓢獨喟然之
句炎亦多與朱子往還之作交誼頗篤其詩
文博雅精深亦具有根柢程敏志輯新安文
獻志所採最多而此外議論純粹引據典確
者尚不可悉數蓋學有本原則詞無鄙誕較
以語錄為詩文者固有蹈空徵實之別矣乾
隆四十六年七月恭校上

總纂官臣紀昀臣陸錫熊臣孫士毅

總校官臣陸費墀

雙溪類彙序

余為丞尚璽少保四明沈公雅好雙溪集惜其秘於金匱石室中世人徒耳而嗜也圖欲表之余因請得拜受退而鳩工梓焉竟則弁其首曰王氏自始興文獻公導以來散居江左衣冠與六朝相始終其間豈乏作者惟文憲公儉集傳不朽夫深山大澤有龍有蛇呵風雲而陳琰琬三尺赫號之紙直紆其胸臆以夸詡藻繪世亦卒無以摩其壘而攻其瑕如右丞之句昌齡之詩也者

可謂後先競爽矣嗣是諸王欲求文憲公集而讀之發
已藏於名山大川寥寥不可得懷耿慨者徒賦夕陽野
草爾有宋肇興諸儒輩出三槐半山後先柄國則始興
哉固不少遜要之斷霞零露銷歇有時如我雙溪公者
辭不粉飾而道勁擣章政不峻急而懷惻流惠性不脂
韋而嚴毅立朝論不詭隨而和平定是其起家也登乾
道進士而敷歷中外也始為臨湘令精于吏治下有所
濫見以為棘心故釐假手之士而風清罷無職之祿而

倖塞上有所索見以為剝肌故杜前任之舊靡羨餘拒
和糴之令靡侵蠹至策襄陽為國之門戶而恃江陵為
唇齒鄂岳為根柢也非封疆之臣石畫耶第非凡所見
誰報可爾比入中都官博士以壽皇在殯而開講讌間
為非禮朝議凜凜于公矣慶元四年為實錄檢討尋入
著庭為佐郎由是有東都紀年之典焉嗚呼方大奸之
戮也世皆以為無憂公謂霍氏之滅漢宣嘗收權矣其
微附貴要者漢宣不能盡察也太平之誅明皇嘗收權

矣其交通近習者明皇不能盡禁也弊在元帝肅宗憂
方大耳知言哉宋事如左券矣所謂廟廊臣者非耶大
抵公學傳于南軒而自得之趣則公之所自許故遺文
不藏名山大川而以金匱石室為山川其藏固矣詎能
負之而趨抵今學士得捧而讀焉信非文憲之寥寥者
比迺知江左風流斬襍侯印為未易奪者其視公之印
可真天壤哉公世居婺源武水之曲雙溪合流因以為
號邑有端風祠祀先哲也雙溪名在祀典中楚楚精神

駕文螭而盼蠻是為不朽之盛典亦為衣冠之世族也
集今行於世賦樂府一卷詩詞九卷文十七卷沈公有
定論矣余姑論其道術徽猷以為後學仰止云敬序之
以復沈公也時萬曆丙申春三月穀旦賜進士第尚寶司
司丞海陽見菴王麟謹序

金氏口述

序

欽定四庫全書

雙溪類稿卷一

宋 王炎 撰

古賦

水西風光賦 并序

隆興癸未冬龍圖閣待制呂公來守新安覽其山川而
樂之後八年卜居于城西南隅榜其樓曰水西風光門
下客王炎賦之附于衆作之末其詞曰

古歛為郡山水奇秀飛仙徃徃窟宅於其中號居江左

十州之右至於水西之勝槩又稱甲於一州挾以披雲之孤峯遠以漾沙之寒流昔翰林之詩伯騎鯨魚而來遊至今墨客騷人無不劇談其高風而漁翁樵老亦能尋訪其遺迹人與景而俱勝首尾三百餘年而不可再得那知神崧夫子之卜居而氣象反高乎疇昔豈非人物為主山川為賓故風光雖滿於天下然大半落莫而無聞苟有恃而獲傳歷千載而不朽有白傅而知香灘因叔子而知峴首浣花寄聲於工部醉吟之篇輞川託

跡於右丞丹青之手况如我公三朝廊廟之壽俊六世
軒裳之故家何紫乎文石鳴玉乎金華一旦丐閒引身
而退傲睨於烟塵之表袖手於功名之外遂令水西之
聲稱自于今而益大飛檻渠渠壓城之隅予雖未獲寓
目於几席之末緬想其臨高眺遠凡可以悅耳目而娛
心志者一皆領略而無遺公舊為伯於此邦留去思於
千里父老兒童見公而喜故雖山靈與溪神爭欲回巧
而獻技攬波光空翠於冥濛杳靄之間閱雲烟沙鳥於

旦莫晦明之際飄然如坐蓬萊方丈而下視人間之世
憇曲几以欠伸撫修欄而倚徙彼謫仙放浪而一來非
可同日議也無已則猶有太公望之事乎處則釣渭水
之璜出則佐六州之王方聖天子之仄席登耆英於廟
堂胸中之策十未用其五六恐未可留意於山水之風
光

竹賦 并序

小人之情得意則頡頏自高少不得意則摧折不能自

守君子反是竹之操甚有似夫君子者感之作賦以自箴其詞曰

晦叔讀書南齋之上門巷僻左交游日稀環以桑麻之場帶以瓜芋之區路折西南萬竹蒼然下緣乎曲澗之涓其清可以延風月其高可以擾雲霓珊珊乎鳴蒼玉之佩搖搖乎舒翠鳳之旗森森乎甲冑之襍峙而切切乎矛戟之參差其偃蹇挫折者如忠臣節士赴患難而不辭其嬋娟蕭爽者如慈孫孝子侍父祖而不違其挺

拔雄勁者氣毅色嚴又如俠客與勇夫其孤高介特者
格清貌古又如騷人與矍儒予雖朝夕吟嘯於其下曾
無以名其美而狀其奇然泛觀宇宙之中萬物均涵育
於一氣而有剛柔堅脆之不齊榮者必悴盛者必衰實
繁者易剝色麗者早萎惟松柏之有心及竹箭之有筠
足以閱寒暑而貫四時春日載陽山川含滋零露兮宵
潤惠風兮饒披或萼或條或茁或莖含英吐華天天怡
怡竹於是時清而不腴冬日初寒天地積威雪慘兮冰

堅風號今日淒川原千里木脫草枯香盡芳歇掃迹無
遺竹於是時秀而不癯今而後見其含德之有常特操
之不移此吾所以無羨渭川之千畝有取淇奧之猗猗
願定交於金石邀歲寒以為期否泰兮消長剝復兮乘
除秉吾心之堅一視此君乎庶幾

雉賦 并序

之野外見一雉為野人所得悼其輕敵不戒而斃焉因
作賦以自警其詞曰

絳冠兮綠跗翠衿兮錦衣耿介兮自守雄鳴兮雌隨平原兮淺草徐啄兮卑飛何野人之機巧乃以媒而致之方氣驕而賈勇敢直前而不疑事常敗於輕敵碎身首於須臾肉不登於鼎俎毛或用於旌旗子玉無禮而殞命趙括狂勇而喪軀鄴舒怙俊而遭殺卻至稱伐而見尸苟謀身之有累皆災害之所罹翠有羽而就羅雞以尾而為犧鴈不鳴而先烹鸚巧言而長羈信涉世之孔艱雖後悔而何追惟羽族之至靈獨丹穴之鷓雛雖

兮音聲鏘鏘兮羽儀摩千仞而高翔豈矰繳之敢施茲
吉人之能事於鄙夫兮何誅

夏日郊行賦

四月維夏先晦三日子王子散策於東臯之上爾汝老
農問勞既畢遂曳履乎委巷之間反而息肩乎喬木之
側喟然嘆曰以吾流目之所見物化之亟如此哉麥穉
穉而餅餌桑陰陰而繭絲麻旆旆而沒人秧芄芄而布
畦蝸解甲而效鳴鴛遷喬而載飛雀遶屋而孳尾烏俯

巢而哺雖是孰幹其機緘至於日運而不齊也耶吾聞
二氣嘘吸一瞬不留向之溫然者俄而為今日之夏今
之燠然者又且為後日之秋所以使人慷慨增懷踴躍
自激感歲月之遒邁畏功名之湮沒故志士之競時殆
不容乎寢食如予之椎鈍遲魯則姑苟安而休息者也
人方逐逐我獨徐徐人方役役我獨于于諒愚智之懸
隔宜動靜之殊塗其在武水之曲有先人之敝廬一裘
一葛日飯一盂非掃軌以謝物且杜門而讀書付榮枯

於自然庶順命而無違抑古人有言曰優哉游哉聊以
卒歲是其獲我私者乎

喜雨賦并序

丙申夏四月武昌闔郡不雨越五月三日崇陽宰吳侯
以誠禱雨遂優渥按春秋僖公三年春正月不雨夏四
月不雨六月雨說者曰書不雨者閔雨也書雨者喜雨
也喜雨者有志於民也今吳侯禱雨以誠不崇朝而雨
隨之可謂有志於民矣作喜雨賦其詞曰

歲行於涇灘之辰斗建於實沈之次環鄂渚之七縣值
亢陽之為沴風自南而且霾日將北而如燬雲霓鬱而
不興旱魃驕而孰禦策余馬於郊牧喧龍骨之呶嗷漉
池瀦其既竭陂堰支其斷流視衍沃而龜坼况高田之
未耰苗已悴而半槁懼西疇之不收幾張頤而待哺舉
蹙頞而增憂粵桃溪之令君念民命之惟穀茲土曠而
農惰雖儋石而無蓄緊告糴之少艱米翔踴而如玉儻
既月而旱甚民必仆於溝瀆講雩祀之故事虛心齋而

竭誠謁梵王之蓮宮羞蘋蘩之潔清歎仙伯之靈巖釋
輿馬而草行陰曠曠以隨蓋颺悠悠而擁旌柱礎濕其
有汗鐘鼓鞞其無聲紛舉手以加額曰雨兆其已形龜
日歲儀肅我庭宇駕龍駮螭攸屆攸止雲將前驅雨師
踵至越三日而為霖罄一同而均利稼芄芄而驟蘇澮
汨汨而如注免為殍於凶年占築場於樂歲沸輿頌而
載涂歌令君之陰賜其歌曰霖霖兮涵濡汚邪兮滿車
其饒兮有黍稷兮可炊豈弟之澤民肥不懼我字我

撫公留勿歸均此大惠公歸勿徐吳侯聞而哂之曰父
老之言何美之溢也向也民憂而憂此吏責也今也民
喜而喜吏不敢以為德也然旱而禱禱而雨如重負之
獲釋也酌我醕醴旅我斝核合僚友而一笑吾敢忘夫
帝力

中隱賦 并序

三衢留侯以中隱自處范石湖為書二大字以表章之
侯有中隱對自叙甚詳夫若隱若顯內心泰然不為圭

組所累侯之志高矣顧進為於世功大名白民受其賜
侯未可辭此責也乃賦之曰

子留子道高而位下豐蓄而嗇施發揮所有可以雷霆
一世而畏人之知沈酣自得於理義之府盤薄不驚於
功名之塗廼以中隱扁其室廬園蒲曲几詩編酒壺凡
世間尤物一切無有蓋淡乎如逋客之舍幽子之居吾
見其鼻間栩栩鬚鬚顏色殆將貴吾身於隋侯之珠眇
外物於秋蟬之翼此所謂與道逶迤一龍一蛇不露文

彩如玉如石者耶夫孤竹二子采薇西山揭日月於百世之上可望而不可攀槁項黃馘山澤下士徒悅其風未喻斯旨友麋鹿於閒曠之墟玩魚鳥於沈寥之渚惟陸沈而無用徒牢關而固拒故荷蕢與耦耕均聖門所不許萬夫一賢天地間氣海涵岳負以育德游必迎解以為智陽潛于泉則草木無色雲出于山則膏澤千里古之抱此道者屣脫富貴而無累蟬蛻塵埃而不緇然燕坐一室而經營四海未嘗泊然與世而相遺投耒耜

而執玉釋版築而乘車萬物賔從受其寵綏蕭條陋巷
之布衣詰屈乘田之小吏非為我而不為蓋欲為而不
遂先生彈冠而出曳履而趨豈無意於斯人而何以隱
為漆園傲晚達近乎詭金馬玩世和失之鄙準繩以中
又安取此有如樂天可謂賢矣不膏肓於邱壑之下不
柴柵於紳脩之間招釋子於匡廬之阜呼酒徒於香林
之灘得喪兩忘去就俱閒無乃欲眇今世而尚友與斯
人而比肩雖然進退有正以義為主可否無固因時為

度元和之際猶莫盡其所懷長慶之後可飄然而引去
時既異而轍殊何必追其故步曲阜之野麟出而非岐
山之陽鳳鳴而宜可隱而見其中躁可見而隱其德孤
吾欲與白傅異議廼申以招隱之詩其詩曰白銀雙闕
高巍巍佩印如斗生光輝藥石之妙國可醫縮手未試
衆遲之前旒側席九天上青雲發軔遙其驅

釣臺賦并序

自乾道丙戌至紹熙辛亥凡四過嚴瀨此身老矣閱世

寢久更事滋多感今懷古有慨然於心者艤舟徘徊久之遂賦曰

理予舟而東逝兮言將至于中都過釣臺而屬目兮少
弭節而躊躇山寂靜而江空兮中有高人之祠去之千
有餘歲兮清風至於今而凜如慨予懷之有感兮思鬱
紆而欲攄昔者夕金嘗一仆而再起兮真人翔於參虛
羣公攀附其鱗翼兮策高足於天衢功烈藏在金匱兮
封爵載諸丹書大冠長劍之陸離兮又寫以南宮之圖

先生適際斯時分獨深潛乎江湖雖可致不可屈分思
魚釣吾其徑歸羞富貴耽貧賤分夫何眇一世而偈馳
粵若聖賢之制行分其大致惟出處之兩岐人臣仗鉞
而觀兵分二子餓首陽而采薇君王溺冠而傲士分四
老遜商顏而茹芝意固各有所為分非好惡獨與人殊
載考西都之將季分先自裂其廉耻之維饒悻直到于
闕下分章忠諫斃于縲纆彼泰於寵祿而不去分惟其
上所招麾孰肯為我死亡分金城圯而莫枝莽上下其

目以旁睨兮敢挾斗筲而覬覦雄作美新以蒙羞兮歆
獻符命以導諛可勢奪與利啗兮龜鼎遂隨之而轉移
世祖折節以下巖穴兮蓋懲夫覆轍之車訓仁義而戒
阿諛兮亦豈無意於當時重臺閣之繩督兮輕廟廊之
訐謨前有軒冕之榮兮後有斧鉞之誅朝正位於公府
兮夕隕命於囚徒羊裘逝而不留兮非特先見乎幾微
上以警一人之失刑兮下以厲多士之廉隅噫有國者
亂亡相尋兮未始不自夫名節之先隳麟鳳曠世不一

見兮是焉可以繫維漉酒扣舷而遐想兮乃申以斐然
之辭玉帛雖不到數澤兮豈無逸民老於樵漁私其身
不憂其君兮何取夫遠走高飛而獨居

林霏賦 并序

致政胡丈思成燕居之所扁以林霏模寫其景寄於詩
囊書笥誦其詩觀其畫令人心志翛然厭薄塵垢因成
古賦一首其詞曰

倚蕭灘之北澹萃闌闌之萬家獨德人之結廬却市聲

而無譁開樓觀之淨麗納江山之幽遐疑老仙之一壺
藏物色之清佳招鷗鷺與忘機湛方塘之淺綠衛以竹
君之蕭森絢以蓮娃之溫淑鬱喬木其參天輪清陰而
覆屋抱虛白而不染攬空翠而可餐酌瘦藤之釀玉彈
素琴之無絃睇飛鴻之冥冥覺燕處之超然主人為誰
澶淵居士方時承平家在中土偶赤縣之陸沈隨一龍
之浮渡非無意於著鞭可聞雞而起舞恥捷徑之別驅
甘康莊之徐步張使禮於蜀道把州麾於淮浦回老眼

而內觀笑浮名之絆身遂選勝而卜居以頤神而保真
規子美之浣花摹樂天之香林尊德誼者陪鳩杖而春
容談勢利者望龍門而逡巡乃相與竊議曰此非持已
之潔而矯俗之汙者歟有卷舒之道而無悔吝之疵者
歟眇外物於蝨股而貴吾身於驪珠者歟徜徉塵垢之
外而與喬松為徒者歟居士聞之局局然笑曰斯言過
矣吾何有於是其歸來若差後於淵明其止足尚庶幾
於疏傅既婆娑而即安亦逍遙而無累客乃隳括其辭

以命管城簿寫林霏之佳趣

石菖蒲賦

并序

予書室中有石菖蒲一本鬱然暢茂蓋資水石之清幽以遂其性此物醫經所論可以延年可以成仙第人取而食之蒲喪其生矣然則為人養生者非蒲之願也因讀北山翁集有水菖蒲賦一篇三折四復詞既妙麗而興託高遠乃拾其遺論而賦之曰

老石嶙峋金鐵貞兮浮雲所根氣潛蒸兮下漱冽泉玉

鏘鳴兮感節盤屈託以生兮附堅涵潤密如積兮四時
青青不改色兮烈日凝冰無能厄兮潛蓄幽馨如有德
兮后土富媪載品彙兮其秀其英拔類萃兮虬髯者松
負勁氣兮惟竹虛心古君子兮蘭有國香儕高士兮梅
也如玉勝靜女兮得土則繁否則悴兮獨根于石孰如
蒲之精粹兮有荇有藻產漣漪兮可薦可羞播聲詩兮
亦有芙蓉媚芳池兮紅衣素裳美且都兮下視其本著
淤泥兮潔淨不污孰如蒲之清癯兮來自澗谷入吾室

分鑿石瀦水保翁鬱兮零露宵泣珠的樂兮甘雨時濯
溜塵滌兮中心愛之久無數兮方士者流言可食兮養
心益髓將引年兮一寸九節可登仙兮帝經君錄其言
然兮予乃獻疑進末議兮彭聃最壽終亦逝兮喬松飛
昇兮安在兮屑而餌之蒲何罪兮毀璞雕刻玉不幸兮
枯骨抱易龜隕命兮破為犧樽木失性兮彼美維蒲吾
良朋兮前有韋編後黃庭兮全真育和共欣榮兮優游
卒歲淡然其忘情兮

辭

鳴水洞辭并序

艾西有澗水自黃龍山西流達於巴陵郡之平江而注于湘水平江故羅縣以地志考之此水即汨之原也其間泉石最佳處曰鳴水洞青山中裂水行石上懸注崖下為瀑流遠望之如曳縞素迫視如撞瑤玉而碎之瀑布上水徐行則皺綠度石齒間多沸白如操琴筑音又其上石絕水為疊石之窪大小不一皆如古樽壘錡釜

狀水與石爭怒聲瀕洞如風旋雷吼兩崖皆峭險不可
陟降蒼松數百株相扶瘦立枝格偃屈据木末俯眦崖
下使人神淒髮豎有蕭條遺世之意崖上有轉雷亭韓
舍人子蒼作而名之歲久亭壞惟故址僅存沈粹卿攜
酒邀予遊其上愛其景清甚欲去復留予不能飲亦累
數觴不醉薄莫始歸粹卿曰此境視之不減匡廬三峽
畫之當勝輞川惜其在窮山深谷人無知者移而近通
都大邑其價可值萬緡予謂泉石之奇絕山靈愛護留

以遺幽人勝士非求知於世俗也馬蹄車轍不至山間
乃能全其清耳粹卿以予言為善因識其大槩而系之
以辭曰

艾之西兮汨之原山石劃斷兮穹嶽而嶄品瀑流下注
兮其上絕而為壘有蛟有龍兮伏而不怒雷鳴崖下兮
窮年風雨誰斧鑿此雲根兮遺予以壘洗松有樛枝兮
屋之深深苔蘚斑斕兮織績以為茵觴酒于上兮聽瀑
浚西峰銜日半規兮徘徊猶未忍旋予欲緼朱絲兮節

清音而度曲招玄鶴使舞兮醉予醺醖有玉韞積兮幽
人之軸秋蘭之珮兮夫容之服瘦石寒泉兮矢其弗告
四墉無隙兮巘嶸青青白雲漠漠兮截洞口以為扃輪
鞅莫來兮無傷我清不執券而兼并兮莫予與爭

懷忠堂辭并序

顏魯公知湖州作放生池又刻碑池上其碑見存池畔
有魯公祠堂題曰懷忠北山程公嘗作楚辭一章刻石
廡下其辭甚古然未盡事實因以辭續之

跂逸駕兮前修佩武符兮典州迹已陳兮德新可敬而
慕兮幾春復秋意其存兮閱千萬年之原謂其逝兮乃
在浮羅之顛奮忠精兮取義貫羲娥兮爛然隘塵寰兮
上征揮八極兮為仙黃鵠脫驂兮素虬停駟幾弭節兮
念遺民而來顧高弁蒼蒼兮清苔瀾瀾公來遊兮湖山
增美遊觀罷兮來歸有蒲與荷兮清冷之池魚鳥懷生
兮欣欣焉其有依銀鈎蠶尾兮燦翠珉而陸離絃琴兮
擊鼓羞羔豚兮酌醕跪起以薦兮願公燕喜公燕喜兮

吾民樂康却災沴兮蠲除不祥雲來兮萬祀丞嘗兮不忘

頌

太廟瑞芝頌并序

聖天子光奉貽謀嗣守神器兢業不懈日親萬幾間五日一朝于兩宮蒸蒸翼翼問安侍膳惟謹聖孝昭假天地祐助祖宗顧歆乃慶元五年秋八月壬申玉芝產于太廟太室之西楹越十日辛巳有司以聞詔丞相帥百

僚縱觀叅考圖謀是為上瑞維時近重明節鑾輿詣壽
康宮奉香以進太上燕豫天顏怡懌越六日丙戌朝于
壽康宮款侍至日中昃清蹕始還九月庚寅朔用家人
禮奉玉爵上千萬壽于宮中孝慈浹洽佳氣葱鬱於是
公卿大夫及都人士女外薄海隅無不歡喜乃知國有
大慶中外禔福廟社奠安休徵之來符應彰灼如此臣
不肖秉筆隸太史氏敬敷叙本末書之汗青藏諸金匱
石室以昭示來世永永無極又念昔漢甘泉宮九莖效

異唐延英殿三花吐秀與產于廟楹不可同語而一時
君臣動色相賀歌而詩之以自夸詡載在方冊猶為美
談今瑞不虛出慶事曷來福祿曼羨是宜被之管絃播
於樂府以鋪無前之宏休臣職在鈇槩罔無歌詠附入
英莖之奏則歸美報上義誠有闕心甚懼焉謹拜手稽
首獻頌曰

宋紹天命列聖重光丕緒駕奕施于無疆少海日升慶
元五祀淵默面南格于天地於穆清廟玉芝呈瑞蔓蔓

其華麗于丹楹匪根斯殖匪葩斯榮和氣融液不春而
生其瑞維何祖宗咸喜神孫致孝孺慕無已有開必先
產祥隕祉其孝維何神明可通問安寢門四輔翼從洗
爵為壽雍雍在宮莫大之慶朝野攸同賚爾高年曰予
錫類頒爵輔臣曰汝予助三宮宜樂萬姓歌舞維我高
廟中興集勲神器所傳藝祖之孫重華之斷壽康之仁
凝神冲漠不俟倦勤羣黎屬望天啟元子四聖揖遜千
古顓美主鬯匪易秉心肅莊以奉重闈媚於慈皇崇德

尚賢心膂股肱盡擯浮偽慈皇是承醞酢萬微未明當
依不蔽不疑慈皇是以民附于仁天鑒厥誠對越在上
祖宗之靈貺以瑞物胙其德馨昔在紹興芝嘗再茁仁
皇英皇二祖之室曾孫篤之克肖其德受是珍符寵綏
四國曷以祝之萬壽無極又曷申之子孫千億有德有
瑞隱顯合符自今以始史將婁書皇德日新勿替厥初

樂府

明妃曲

掖庭國色世所稀不意君王初未知欲行未行始驚恍
畫史乃以妍為媸約言已定不可悔氈車萬里隨單于
玉鞍紅頰空回首烏孫公主王明妃高皇兵敗白登下
歸遣帝子稱闕氏欲平兩國恃一女烏乎此計何其疎
至今和親踵故事延壽欺君何罪為此生失意甘遠去
此心戀舊終懷歸塞雲慘淡氣候別風沙四面吹穹廬
琵琶曲盡望漢月塞鴈年年南向飛

公無渡河

黃河浩浩不可航腰壺欲渡何其狂
嫗挽翁衣願無渡
忠愛深言反逢怒河流滔滔翁溺死
老嫗搏膺淚如雨
行人勸嫗莫痛傷痛傷之極能斷腸
古來懷諫多不祥
鴟夷浮江吳國滅老臣疽背霸王歆

雉朝飛

飛飛野雉雄挾雌相與葦尾為之妃
人生誰不有配耦
我生垂老為鰥夫永巷蛾眉幾干指
一妻一妾庶人禮
壯年受室不及時老去自憐身獨處
短布單衣誰為縫

東臯種黍誰共春蒼天高高不可問願照衡茅有孤悶
關山月

陰山蕭蕭木葉黃風高馬健弓力強鐵衣萬騎向北去
仰看鴻鴈皆南翔身在邊頭家萬里嗚咽悲笳壯心死
功成歸取漢爵侯戰敗沒為邊地鬼團團霜月懸中天
閨中少婦私自憐捐軀許國丈夫事莫恨不如霜月圓
白頭吟

青絲織作雙鴛鴦紫絲繡成雙鳳凰在家不敢窺屏著

心願出門逐夫壻琴中解道人心事不辭半夜將身去
君親滌器妾當壚豈料賦成天上知臨邛舊事不記省
千金多買青蛾眉嫁時衣裳今尚在妾貌未衰君意改
當時去家恨太遲今日思家翻自悔玉環既斷不復連
青銅既破不復圓古來佳人多薄命不見鸞膠能續絃
但願新人同燕婉桃花長春月長滿

飲馬長城窟

春風塞草青邊城區脫靜秋風塞草黃邊騎角弓勁秦

人驅丁夫築城備匈奴城成有虧日匈奴無已時哀笳
中夜起戰馬豎籟耳蒼茫沙上月幽咽隴頭水征人悲
故鄉閨人守空房安得霍嫖姚飲馬瀚海旁

門有車馬客

烏鵲遶屋鳴有客停征騑問客何自來君家寄家書攝
衣起迎客開書多苦辭舜花不長好玉顏亦易衰水行
有却流人行無反期置書拜謝客豈不心懷歸事君有
明義不得顧所私作書附客返路遠幸勿遺上言重自

愛下言長相思相思勿相怨自古多別離

出塞曲

羽檄走邊遽虎符出精兵壯士卷甲起骨肉送之行擊
筑歌易悲挈榼酒更傾關山殺氣纏寒日無晶明箭落
紫塞鷗馬裂黃河冰豈畏敵騎多只憂將權輕聞外不
中制一賢當長城鼓行渡沙磧願勒燕然銘

遠別離

靜女不下堂游子志四方五花驕馬金絡腦出門僕從

生輝光草青沙軟濕春霧玉蹄聯翩踏花去樓頭明月
闕又圓西風一夕生庭樹明璫綴以木難珠錦衣繫以
貂襜褕青眉玉頰為誰好天濶飛鴻無素書今年花落
容華在明年花發容華改離鸞別鵲不自憐人生難得
長少年

擬古閨怨三首

為郎縫春衣春盡郎未歸羞見庭下花一雙胡蝶飛

良人久在外想像裁香羅放下金粟尺無言蟬翠蛾

三

花開復花謝墮在藩溷邊不惜花落盡惜無長少年

粧樓怨

并序

曾開府有內嬖二人置之別第曾死夫人逐之扃其門
無為王宰曾容也為賦粧樓怨蜀人韓毅伯賡之毅伯
過臨湘話其事因出詩藁炎亦賦一篇

長安甲第凝丹碧門外如雲珠履客主人對客懶將迎

別有洞天雙國色簾幃不動春風香迺翁但醉流霞觴
綠絲垂地細君惜從今可老溫柔鄉歡樂短憂恨長鳳
飛何在遺其凰不言不笑念恩怨明月無情窺象林春
暖花枝啼曉露此身今是花無主可憐高塚卧麒麟不
許畫樓棲燕子

薄薄酒

薄酒可成禮何必飲上尊醜婦可成室何必求麗人人
生有欲皆求得誰能有得終無失多箴未免誨穿窬厚

味亦能生疾青鞋緩步可當車不用駟馬黃金羈茅
簷之下庇風雨不用丹碧文椽題緼袍布衾亦自暖不
用狐裘蒙錦衣菜羹脫粟亦自飽不用五鼎羞鮮肥月
盈不償闕物盛必有衰逐客可相亦可夷餓隸為王又
為菹欲從意滿神所忌吉凶反覆相乘除吾聞猩猩罵
人非不智以醉就禽猶惜屨鼃鼃窟穴深更深卒為人
得由貪餌古來達識照其幾外物視之雙弊屣於陵辭
聘寧灌畦禦寇辭粟寧忍飢逃禁無辱二疏去今是昨

非陶令歸請君莫嫌薄酒薄瓦甕匏尊任斟酌請君莫
嫌醜婦醜荆釵布襦與偕老天寬地大得自由如此足
矣何多求

雙溪類稿卷一

欽定四庫全書

雙溪類稿卷二

宋 王炎 撰

古律詩

夏日雨過

雲潤日杲杲渠澀泉泠泠羣山曉過雨一沐千髻青岸
巾納微涼庭戶留餘清喬木俯佳色野卉含幽馨昔來
挽枯條今來見欣榮榮枯亦何有對此難為情長年心
事多撫髀只自驚冰炭交中腸吾生安得寧好風吹我

裳頗覺耳目醒
暇日可少憇
安用心營營
高卧綠陰底
玄蟬相對鳴

村行 二篇未第時在大坂作

青山護村落
暗水通溝渠
人行禾黍間
漫漫迷所之
里社壓新醪
擊鮮賽叢祠
田父相勞苦
雨暘無失時
龍骨挂屋敖
秋熟可預期
行行度岡澗
泉石多幽竒
微風發清籟
好鳥吟高枝
此中有佳趣
豈無幽人知
去住兩不可
空吟招隱詩

雪晴即事

宵爨懸釜星曉光落窻牖烏鵲如謠人賀語亦交口收
盡白糴趁青山併還舊門巷未掃除家童具箕帚物色
不招挽顧盼左右有梅兄可納交竹弟亦耐久毛錐得
奇助引我琢句手酒國百無憂問津其敢後逐逐春意
來孤村又花柳

呂待制所居八詠

半隱

舉世競寵利嗜進無肯休山林槁項輩又乏經濟謀
竭來半隱寮再拜瞻呂侯袖手辭富貴結廬清且幽我從
為兒時久矣聞風流父老數時賢若人真少儔已覆金
甌名姑作綠野遊四海望霖雨爭欲挽之留向來釣璜
老一出扶宗周廊廟方側席公肯幡然不

舒嘯

黃山峙立高崔嵬上有飛仙時往來問之誰作東道主
舒嘯亭中人姓回坐對危峰倒樽酒偃仰胡床篆烟吐

劃然清響透雲端此意悠悠眇千古好是夜深孤月明
風松泉石清更清我來擬作叔夜輩一聽空山鸞鳳聲

緩步

躍馬乘軒四十年誰知公是地行仙向來曳履星辰上
今作遊山杖屨緣總為鼻端清栩栩能令脚底步翩翩
青鞋若許陪行樂早晚誅茅半隱邊

月臺

我欲登仙換凡骨飛上雲頭窺月窟拜妻問我何自來

笑指廣寒令徑入歸來却見半隱翁月臺如在神仙中
霓裳歌舞不用覩把酒長嘯生清風

藤洞

空中一洞足清風上有長藤翠蔓穠說與山靈護持取
蒼皮瘦骨恐為龍

歲寒

春陽競媿媚百卉顏色好涼秋風露來徃徃競枯槁一
朝受霜雪脫落遽如掃特立金石姿青青未嘗老下視

軟美輩推折不自保
古人幾失言疾風知勁草

朝陽

臍膊雞聲夜向晨
東方飛景到雲林
簾幃已是矍矍曉
庭戶全無矍矍陰
可是梧桐長得地也
知葵藿久傾心
日邊早晚來環賜
見說清光注意深

醉松

虬髯鐵幹老嶙峋
氣格儼然冠劍臣
應為孤高多絕物
未妨偃蹇且全身
雪中屈折如頽玉
雨後淋漓又吐茵

撫手摩娑三嘆息世間那有獨醒人

太平道中遇流民己丑

丁男負荷力已疲弱妻稚子顏色悲親戚墳墓誰忍棄
嗟爾豈願為流移春蠶成繭穀成穗輸入豪家無子遺
豐年凜凜不自保凶年菜色將何如但憂銜恨委溝壑
豈暇懷土安室廬故鄉既已不可居他鄉為客將誰依
黃雞啄黍白酒熟去家未久吾懷歸農桑不事得溫飽
見爾令人顏忸怩

遊硯山 壬辰

他山石徒多器寶匿幽僻產璞芙蓉坑金聲而玉德岡
巒外鈎聯地勢中斷隔曲塢八九家路入羊豕迹澗水
抱石根石骨多紺碧北上撓天南山勢蟠伏硯工二
百指日鑿雀鬼腹篝燈礪斧斤深入逾百尺我行冒風
雨周覽不知夕夜宿茅茨下青燈照岑寂酒闌呼匠氏
訪之語纖悉冰蠶吐銀絲鮫人織霧縠巧手琢磨之價
直黃金鎰斷品半傾歌舊穴久湮塞旁求得他材飲水

不受墨堅滑已支庶羸燥乃臧獲信知天壤間尤物神
所惜罕見固為貴有亦未易識璠玉混一區語盡三嘆
息摩莎蒼蘚崖此言可鐫刻

山間偶成二絕 庚寅

人家雞犬近相聞村落紆回古木深山客一來塵想盡
水聲終日奏鳴琴

隔枝啼鳥喚幽夢排闥青山無世情綠樹陰陰遮日影
虛窓卧看白雲行

雪中懷韓毅伯

雞罷三號來曉色披衣起見瓦溝白雪初墮雲遽回
天意應憐未歸客男兒鐵石為剛腸忍窮不見可憐色
當知曳履郭先生可作餐糲藜屬國

和韓毅伯詠鴈

孤飛欲作上林遊塞北來時天始秋世路豈無矰繳慮
水鄉聊作稻梁謀摩雲不憚關山遠刷羽定非雞鶩儔
待看草青烟浪暖帶將春色離南州

梅花

歲暮殺氣慘草木華葉萎寒梅吐新萼娟娟擁疎枝清
意塵俗遠幽香風露知孤絕慣守獨晚出甘後時細推
萬物理榮謝相乘除桃李向來繁試問今何如

犬捕鼠

黠鼠穴居工匿形宵竊吾餘頻有聲狸奴已老無足忌
對面侮人渠得志韓盧千載雲來孫平時禦盜嚴司存
小施逐兔騰山力不露爪牙潛有獲主人高枕終夜安

論功法吏能掃姦繩以漢家三尺律鼠罪貫盈猶不職

春日

小凭筓輿行野田麥芒桑蕾春無邊勒回風物未全好
小雨班班天護寒入門烏鵲枝頭語鴻鴈好音慈母喜
車馬不來門巷窮桃花自作深深紅世間萬事易冰冷
春來無處無東風

春日書懷二首

杜門值春初出門已春莫子規日夜啼為我訴春去萋

然草彌望綠暗谿臯路百尺游絲高搖搖引心緒歸來
坐窻底有句不能吐喚取黃嬾來且嘗黑甜味

二

餘月雨新歇風日亦已和佳木頗秀整好鳥仍嘯歌今
我苦不樂如此春意何喧寂有異境窮達元同科此道
貴堅壁外物將倒戈有慨懷古人執柯能伐柯

答韓毅伯五首

用游子莫
何之為韻

為別未一日思君如三秋解后孤城中握手復少留士

方未遇時鮮不困官游君獨芻豢色胸次回萬牛自愧
得之淺誤欲代君憂白壁識者稀駑馬市者稠莫作分
外慮輕重終不侔諸公競推轂失士固所羞

二

情義如投膠去意如激矢險阻要備嘗山川饑行李霜
雪衣裘單燈前話兒女下堂辭親去上堂拜親喜燕頤
能飛揚何必毛錐子

三

憶君初至時投宿村店莫門卷冷如水漫刺來一顧升
堂方下榻出戶復就屨綿袍寒不溫北風攪庭戶念君
何以堪此意推不去強飯登前途為親善調護

四

老松寒不凋古井風無波斯人閱千古所得亦已多句
法餘事爾高處凌陰何寧為擁膝吟無作扣角歌

五

三書上時宰我常疑退之士窮見素守躁求亦何為蜀

客聞此語為我一解頤歲晚歸未得且過江之西未到
意先喜主人賢足依江西魚稻鄉米熟蟹螯肥不妨且
醉飽利達自有時

漁人

西南月未墮白霧吞青山渡口無人行老漁一舟還呵
手繫短纜襜褕犯夜寒捕魚養妻子誰謂斯人間

促織

春山布穀勸耕事秋園絡緯催機杼大家未織吏索租

小家欲織無絲縷無絲可織寒無衣輸租後期罪當咎
悲鳴終夜不能已嗟爾候蟲何自苦

大水行

屯雲墨色日將暮晦明揮霍雨如注水聲夜半搖匡床
平旦出門吁可畏盤渦漾漾吞邊旁悍流洶湧行中央
日中雨復縷縷下溝塍水躍皆渾黃黑風拗怒雷擊地
浪頭起立三丈彊杈老木根株拔峻嶒古屋椽桷裂
快馬萬蹄迸突而憑凌靈鼉百面瀕洞而砢砢銳兵鏖

戰城柵倒猛虎吼崖谷崩旁觀氣奪目力眩瀕流上
下俱不寧升高辟害叫舟楫篙工倚柂不敢行寂寥向
晚頗衰落斷霞返照回新晴鳥飛不盡天界濶蒼烟淡
淡山青青銜杯引滿幸無恙收名魂魄猶屏營往年秋
水沈半壁闔門九死得一生今日思之痛方定一見洪
波心震驚吾聞山挾河回衝底柱峽束江盤投灩澦魚
龍百怪家其中風濤暴橫無終窮小溪常時清且淺漪
漣不動平於板淺津可涉深可梁一旦沸騰能滌茫傳

聞潰洳山裂破黑蛟夜出作奇禍抉崖走石勢力粗十
家六七無室廬百年枯塚尚漂泊變生倉卒人為魚君
不見去年四月不雨至七月澗谿一綫皆斷絕川居人
曾死於暘山居人今死於溺下田黃塵曾蓬勃高田白
沙今障沒嗚呼災害何其頻勸民之命誰肯任勸民之
命誰肯任蒼天蒼天實照臨

冬日即事

曝背茅簷下驅寒得曉晴杜門來客少開卷此心清晦

迹存吾道端居閱世情南山無改色相對免將迎

春興二首

蔓長宜誅草花飛可弔梅
斷雲將雨去啼鳥喚春回
書亂時開帙樽空久覆杯
長年觀景物不復起衰懷

二

山遠煙蒙樹汀回水啗沙雲陰初解駁
春色已光華
土潤麥爭秀日蒸桃欲花
杜門無可喜鵲語誤楂楂

旅興 己丑郡中

白眼看時事剛腸厭俗流也知蜂有毒未信鼠堪投
熟睡消磨日清吟撥置愁倚門應望切早晚賦刀頭

蔬食已丑郡中

瓠白吾何有人言太瘦生富兒皆肉食我輩但藜藿
安得萬錢費應無五鼎烹飢腸雷欲吼一飽亦何營

春雨

喚雨蒼鳩罷山高雲更濺泥深妨著屐水足有扶犁
索酒無同飲哦詩只自題小窓回午夢鄰舍一聲雞

石盆荷葉

月明露冷淨娟娟
收入窻間一掬泉
不用亭亭張翠蓋
也能細細疊青錢
時因新汲分瓶杓
暗有微香散簡編
留待移根栽玉井
開花十丈藕如船

窻外紫竹

踈籬短柵外
鈎聯聚立龍孫已
巖然向日斧斤幾不赦
而今苗裔尚能全
少時秀色青珉潤
歲晚英標紫玉堅
借與風煙扶直氣
稍加歲月定參天

秋日晚晴

斷霞縷脉淺深紅
雨挾涼來助好風
心厭亂蟬專美陰
目隨高鳥度晴空
此身尚落功名外
生理方侵念慮中
坐到夜深明月上
秋聲故故透梧桐

和毅伯見寄

欲問故人歸未歸
江湖不見雁南飛
青雲未上辭鄉國
白壁無因困褐衣
客裏書來行李滯
江南春盡落花稀
倚門望斷山川遠
我却疑君此策非

喜祝季通相訪

一笑掀髯語不休，隻雞斗酒少淹留。
讀書未療一身困，彈劍同懷千歲憂。
喬木擁煙村落冷，西風吹雨稻梁秋。
此中可覓離騷句，躍馬重來谿上頭。

和祝季通韻

踏破蒼苔馬有聲，百金一諾不寒盟。
揮犀議論高流輩，落筆典刑追老成。
犯雪方知松節直，截河不變濟流清。
論交獨許吾同調，翻覆從渠自世情。

南齋中秋小酌

銀河絡角晚風涼，月入庭除滿地霜。
夜靜老翁閒玉斧，天寒仙子舞霓裳。
田家旋斲鴟美野店新芻綠蟻香。
草草杯盤供一笑，暫時耳熱發清狂。

南齋書懷

幽居用拙懶追尋，小徑無人苔半侵。
燕子已歸知社近，桃花半破覺春深。
長編短簡資身策，故歲新年念母心。
拂拭橫床眠未穩，匆匆屋角有鳴禽。

和韓毅伯韻三首

鵲寄先聲到敝廬故人回首意何如我方無事能高枕
子亦徐行可當車小甕牀頭新注酒青燈窻下靜觀書
齏鹽冷淡商今古恐勝朱門食有魚

有客回車肯再過天寒冰雪滿關河家貧草具惟雞黍
地僻柴門但雀羅人固剛腸窮已甚天無老眼命如何
男兒自許功名事相對肯悲彈劍歌

萬里乾坤尚側身諸公青眼拂埃塵平生毛穎義相許

今日方兄情稍親信有朱絃能使鬼肯將拱壁暗投人
不妨歲晚留行色梅柳梢頭已報春

再和前韻三首

扣關剝啄到吾廬覺我論才有不知道在褐衣懷美玉
文成熟路駕輕車而今談笑不攜手他日寒溫徒寄書
勢利之交兒輩事何須有客佩金魚

窮巷曾勤特地過瀾翻舌本落懸河君方迹未離塵土
我亦身嘗墮網羅幸有吾曹相爾汝肯教俗子更誰何

詩成騷雅遺風在壓倒南山白石歌

小屈青雲富貴身翻翻倦脚踏街塵黑貂久弊歲云晚
鴻鴈不來家有親容路山川聊緩帶天關虎豹莫憎人
一寒元是功名兆落筆能回桃李春

追念鮪谿老人

交游大半上青雲可使斯人竟陸沈寒日亂山皆慘色
北風古木亦悲吟傷情空拜丹青像提耳不聞金玉音
舐墨欲書耆舊傳無言三嘆我何心

追悼鮪溪老人

遠屋青山鎖白雲其人如玉已埋沈瘦筇未掃往來迹
遺墨半存長短吟有客不堪頻墮捷此生無復見知音
天寒日短淒涼甚老眼皇天照此心

如大坂二絕

輕風掠面作微涼盡日筇輿行澗岡畦稻欲花新得雨
老農屈指計秋嘗

盤薄解衣方少休青山白水挽吾留一聲杜宇喚歸意

百轉黃鸝生客愁

田間閒步

春光挽我出柴扃道上陳根換短青尚怯東風寒料峭
已聞好鳥語丁寧

晚浴溪上

山脚草深樵徑沒溪頭水落石梁高一川風露無人占
古柳玄蟬處處號

自南齋晚歸二絕

返照南山脚西風古渡頭破烟雙鷺晚抱葉一蟬秋

二

溪涼魚發發山靜鳥飛飛草笠兒驅犢荆釵女浣衣

到白石先妣新塋

淚滴松楸意轉哀欲歸小立更徘徊春風不管人間恨
溪上櫻桃花自開

新晴二絕

初春欲暖未全暖小雨妨晴還得晴多謝東風舊相識

少年樂事已寒盟

鷓鴣喜晴鳴竹枝一篙新浪拍漁磯
春寒稍向日邊破
花信欲從風際歸

溪上晚望二絕

溪深一股渌浮浮橋斷人歸擊小舟
煙淡雲黃來暝色
青山數疊不遮愁

日墮西山煙水昏寂寥雞犬數家村
滄洲歸鷺客停棹
古寺疎鐘人掩門

春日書懷

自憐童穉色淒涼，偃伏田廬歲月長。
用拙漫令文有冢，避愁不慣醉為鄉。
春來雨禁鳥烏樂，天末風回鴻雁行。
軒冕山林兩無得，諱窮徒覺意蒼茫。

送詹少游之平江

溪上相逢把盞時，回頭今是一年餘。
聞君有喜驅都騎，顧我無聊守敝廬。
信道此行騎鳳背，未知何日寄魚書。
月明千里關山隔，莫為新情忘故居。

春日遣懷

感懷細數十年事
養拙略無終日閒
景物自新春稍稍
吾親漸老髮斑斑
豈曾有夢到天上
且任此生浮世間
願約漁樵同小隱
謂予不信有南山

題古塔主語錄

震雷動地音元寂
白月當空指即迷
天下老師應鎖口
此公不肯止兒啼

田間麥秀因成絕句

老穉緣崖鋤草根炊烟不起自酸辛
東臯春到青青麥屈指何時可食新

麥苗已有生意掘烏穉者未止

兒童飯犢女採桑水滿東臯耕事忙
稻秧半綠麥半黃天許食新饘粥香
田父咨嗟仍笑語赤地一年今得雨
紫蠶有根妻子喜免填溝壑棄閭里

雨晴出田間

去年龜兆生田臯今年龍骨挂屋教
烏牛告休卧籬落

夫耕婦馱亦既勞
穡稗不生白水滿
荷鋤出見禾苗高
屈指何時築場圃
割雞炊黍觴新醪
人言饑饉有豐稔
一笑破除心鬱陶

得昭叔弟書

十年客館出無車
倦迹歸來守敝廬
林下巢傾烏哺斷
天邊風急鴈行疎
欲傳消息苦無便
喜報平安今有書
行李何時能緩帶
對床風雨且幽居

臬羹

事出漢書

日轉槐陰宮漏遲
蘭湯新浴生涼颺
四方清晏上燕行
千官鳴玉趨丹墀
鸞刀象箸薦多品
豈無炙鵠蒸羔
射聲彈弋不虛發
獨取鳴臬供膳夫
卯翼深恩作奇禍
有此大罪宜翦夷
臣工拜手謝君賜
惟忠與孝終無虞
高皇盛德號寬大
惡不可赦彭黥
菹惜哉雲夢信先縛
功蓋一世人所疑
賜之屬鏤前事失
淫刑以逞誰無辜
留侯辟穀以智免
酈侯縲紲幾身危
君不見避人不出
畏矰繳商雉深山
鷲鳳飛

聞虎傷人

胸臆包藏不可窺誰能攘臂編其鬚未論犬牛俱受禍
飽人之肉人何辜騶虞不肯食生物自古及今長罕出
吁嗟虎豹山林多陷穿弓刀如彼何

賀景高新居

百楹夏屋勢渠渠氣象歸然壓里閭庭下紫荆方秀茂
階前玉樹亦扶疎門容駟馬于公宅客佩金魚吏部廬
莫使烏衣文彩減諸郎勤讀五車書

元日書懷

年光除日又元日心事今吾非故吾兩板不須書鬱壘
一杯亦強飲屠蘇添丁解事尋王母內子傷時念老姑
欲報情深恩罔極不終反哺愧林烏

到大坂

經年不踏鱸溪路此日重來訪舊游溪上老人今不見
涼風細雨四山秋

江夏道中值雪

歎息謀身拙，棲遲簿領間。
朔風吹密霰，瘦馬踏窮山。
游宦亦何好，浮生元自閒。
去年溪上雪，高卧掩柴關。

蒲圻道中遇雪二首

馬上寒生手欲龜，田廬人靜爨烟稀。
疑逢海上雙銀闕，想見雲中萬玉妃。
野店避風聊解轡，地爐圍火自熏衣。
勞生今被微官縛，何日衡茅獨掩扉。

天慘雲垂地，風寒雪塞塗。
驟看花滿眼，已覺粟生膚。
冷屋無鳴漏，水枝有立烏。
馬寒如蝟縮，行役厭馳驅。

再如蒲圻二首

雲暝雨將雪天低風正寒
簡書端可畏行李不遑安
要路飛騰好窮途進取難
折腰徒自苦吾亦悔儒冠

二

北走葦塘路從公敢憚行
淒涼當短日寂寞過荒城
薄祿非吾願塵緣窘此生
丘園如可樂何必問功名

行湖路

落日行湖尾重袍不禦寒
亂流橫短棹入暝解征鞍
梅

瘦覺春未鴈來知歲殘何時休跋履猶幸得平安

送游堯臣歸閩六首

荆璞天下珍價重金百鎰誰能玉其德有亦未易識陸
沈黃綬間心不計喧寂挽之置通津誰借一臂力窮山
抱白虹緹襲貴燕石

良農種嘉穀未必皆歲豐世間固無巧得喪係其逢汾
上百斛鼎澤陽七絲桐清廟不登薦造物頗未工不移
金石心前哲能固窮

攫金不見人士以貪自欺玉壺有清冰皎皎不受緇畏
義如畏刑律已吾所師一尉百僚底三歲袖手歸鄙夫
額有泚行李惟囊衣

宦游適四方僚友兄及弟所惡薰有猶氣味不相似黃
鵠來自南俛首啄禾黍意欲摩雲霄石交予與汝雞鶩
安用喧短翼無遠舉

火流暑將退車馬戒行役可不舉一杯明日川陸隔北
堂太夫人綠鬢今未白雛雛鳳將雛此樂豈易得軒冕

儻來爾為親謹眠食

松楸不掃灑吾甚思江東七閩在其南雲間無去鴻關
山共明月何時一尊同小游忘年友努力翰墨中鑄金
作龍淵世豈無國工

和游堯臣出郊二首

崎嶇深谷與崇岡王事有期行李忙玉佩泉鳴清醉耳
劔鏗山峭割愁腸鳥鳴花發年華改雨暗雲昏客路長
且喜歸來同笑語蒲團棊几似僧房

小窻獨坐怯輕寒一穗香雲透博山鵲語恁恁來屋角
梅花點點下欄干馬蹄破雨休行後塵尾生風共燕閒
只恐日邊需振鷺銜車早晚趣君還

送游大治歸建陽

西風來鴈歲欲晚衰柳鳴蟬人語離市道交游何足數
君家父子總相知讀書要見古人意立事正須年少時
話舊班荆尚無日莫忘苦語有箴規

送張飾之

俗子問寒溫吾儕相爾汝二年坐窮山蛛網懸一塵剝
啄誰扣關欲語不敢吐有客騎鯨魚迎之倒雙屣家聲
本光融人物亦英偉胸次蟠江湖筆端走風雨贈我瓊
瑤章白虹貫囊褚我如穿鼻犢涉世多齟齬君如側翅
鷹雲路未軒翥杯酒接慙慙縱談傾肺腑百圍飽雪霜
士要嘗艱阻傳說起胥靡夷吾出囚虜淮陰有寄食新
豐有逆旅饑饉必豐年乘除乃天理豪傑就功名但問
歲寒爾相對一掀髯窮通忘愠喜

題周功甫總領石溪三亭并序

周丈有石溪三亭題詠者衆炎為崇陽簿訟檄到郡周丈作手簡封示南軒三詩令炎留題其意甚厚炎既按三詩又一歲再見周丈乃云三詩被游成之攜去令炎再錄一本後二十餘年炎假守吳興朝辭入都周丈子時為寺丞又言及三詩則炎所以見知於周丈者不過此三詩爾感念知己故詳述於篇首

溪亭

表章泉石幽領略鷗鷺間陰陰楊柳邊小築置曲欄平
鋪簟紋綠俯仰眼界寬俗塵不可污漁艇時往還是心
淡如水聲名落人寰身行霄漢上夢遶滄波間我欲從
公游斫鱸覆酒船三弄噴霜竹月高風露寒

雪亭

竹窻環佩聲瓏玲開窻不見山眉青玉妃翦水墮花片
龜手入袖膚粟生紫茵錦幕燎爐熾不知酒面寒欲冰
春葱百指酌暖玉似勝煮茗松風鳴亭中主人笑無語

雪景佳處未易評詩成呵筆筆隨凍冥搜有味銀海明
天風浩浩吹鶴氅欲跨白霓凌太清負暄曝背者誰子
此亭可望不可登

嫣然亭

桃花結子杏花落蛺蝶飛來遶新綠臙脂如醉春意濃
嫣然一笑桃杏俗薔薇之露不浣衣玉頰彷彿生頰姿
無雙國色自愛惜描貌安用詩人詩雨濕東風三月尾
夜寒燒燭照花睡索花勸飲乾百壺美人羞死顰眉翠

題陳巽叔適軒

消搖鵬鷄游小大各有適士墮躁欲中束身就徽墨桃
溪有市隱被褐懷拱璧袖手閱世故不變芻豢色小窓
一蒲團燕坐琴書側豈不對客語青眼送鴻翼自言肥
遯好外物斷欣戚千金戒垂堂一跌在所惜笑我踏風
波轅駒窘羈勒

黃一翁自郡城回

千金一璧傾秦都此璞未剖衆所疑朱絲度曲有山水

袖手不鼓無人知黃香裋褐走江漢失脚未上青雲衢
此客胸中有佳處笑人論士相目皮故闕謁我即辭去
赤霄孔翠不可呼江城邂逅共杯酒塵尾清風生絺絺
步行觸熱兩足繭別後略無雙鯉魚楚山搖落歲又晚
花信首回南北枝青燈抽穗出金粟喜見間闕行李歸
粲然為我啓貝齒知我不見如調飢揮毫妙入斲輪手
倒囊盡出驪龍珠朱朱白白顏色好春風爛漫催花時
肯留花底共醉倒為君春酒滿眼酤襪襪推之不肯去

忍使故人天一涯
摩挲老眼望寥廓
願見秋鷲凌風飛



雙溪類稿卷二

欽定四庫全書

集部

雙溪類彙卷四

詳校官庶吉士臣吳烜

主事臣呂雲棟覆勘

總校官進士臣朱鈺

校對官學正臣翁樹棠

謄錄監生臣任銜萱

欽定四庫全書

雙溪類稿卷三

宋 王炎 撰

古律詩

秋懷五首簡陳巽叔徐伯老

西風脫數葉木末秋有聲團扇內篋中肅肅庭戶清公
退頗無事解衣坐東榮本乏霄漢心未斷丘壑情日月
不肯留奪我雙鬢青陳編堪解頤涼夜親短檠

二

涼風挾秋回蒲柳青欲黃桂樹枝相繆采采含幽芳清
香美無度坐憂露為霜志士有所懷後時多慨慷

三

西南天漢流蟋蟀鳴露草黃鵠垂其翼坐看歲年老寸
陰輕尺璧進德恨不早百圍飽風霜蹭蹬何足道

四

我來今幾時寒暑已一變回首望江東天末鴈行遠弧
矢四方志別離詎能免有懷先君子生理只鈇槩相憶

可相忘問學當自勉

五

我家南溪上老屋四立壁俗子呼不來巷無車馬跡公
庭有將迎未免眼青白陳徐臭味同吾獲雙拱壁拂我
榻上塵與君商六籍

又五首

以游子悲故鄉為韻

一身將百指就食家浮游清霜木葉黃弊笥無完裘平
生三釜心山阿種松楸圓枘運方穿命不與已謀盥濯

朱墨手清江採釣舟

擇友得石交心腹管城子可憐老而禿我窮正坐此玲瓏玉其音六學有妙理抱此為身媒前賢恐不爾翩翩肉食飛書生懦於武

東風黃鳥鳴白露寒蟬悲去日何太短種種髮欲踈人言了婚嫁此事今何如欲耕無一廛兒女牽人衣蠶以繭自纏深念難為娛

跣行我足傷涉世無夷路三復貝錦詩讒口古亦惡兒

女附耳言譽喜訴其怒勿用驅青蠅玉質自如故
竹間有數椽讀書樂未央稻粱自為謀風散鴻鴈行叔
氏從我來季子天一方人生手足愛念之攬中腸誰不
思息肩我豈樂異鄉何時一青燈夜雨同對床

用前韻荅黃一翁五首

天寒鴻鴈低客子亦倦游憶昔少年時風埃蔽貂裘欲
辦一束茅不種千章楸黃鵠入雞鶩亦為飲啄謀豈有
斗升水能行千斛舟

吾友西家黃筆力壓餘子金馬可曳裾胡為亦留此整
整插架書拂蠹自料理三年飛不翔袖手今且爾儀鳳
五色文霄漢終接武

楚容抱玉虹則足只自悲有寶不韞積此計亦未踈子
虛一賦成日邊問相如老眼閱人多君豈一布衣篋中
有瓊瑤把玩聊自娛

秣馬踐古轍經術導先路士要人品高與俗殊好惡忤
心蠶尾毒褊心螳臂怒唾面令自乾吾今乃非故

青雲諸貴人鳴玉朝未央我無封侯骨難入鸞鷲行生
女不出門生男志四方十年九不就食齋苦我腸未能
返故園且可歸醉鄉細君諭此懷春溜鳴糟床

廡舍梅花欲開三絕

花開不肯待春融恐混繁枝深淺紅潔白天然貞女操
清癯獨立古人風

懷人不寄隴頭信寓興亦無東閣詩坐裛暗香供鼻觀
小窻寒月浸疎枝

頗怪涪翁錯下言水仙許入弟兄間恨無好語供題品
花定嗔人頹玉山

郊外見梅再用前韻三首

四山有雪未全融蓓蕾梢頭茁小紅也欲索花同一笑
蒼顏羞澁見春風

皎如玉雪不容緇乞我寒香苦索詩輸與西湖間處士
解吟籬落忽橫枝

故園踈竹蔽柴關手植孤根在竹間別後踈枝無恙否

寂寥風月冷溪山

題咸寧江宰德先清遠堂

築屋俯平湖百頃風漪漣湖底行白雲湖外橫青山
仙官踏兩鳧游戲來人間清都在天上欲去懶著鞭
百里可盤薄苦無敵扑喧試出持蟹手為民奏鳴絃
潘郎兒輩爾栽花作春妍淵明未甚高料理種秫
田捲箔坐繩床香吐一縷烟白鳥入空濛飛鴻度
雲邊箇裏不著愁心與物共閒漁榔勸客飲玉色
亦粲然目極意不盡老

蟾生莫天

生朝無以自慰作留貧薦一杯

私居飯半菽官舍食無肉何乃太清生囊無一錢著人
言骨相寒有智不如福貧者輕於葉富者重如玉輕重
信然否世情手翻覆相彼守錢虜無厭溪壑欲口不談
古今枵然瓠壺腹渠固笑我癯我亦笑渠俗珊瑚數十
株胡椒八百斛冥冥鬼瞰室一跌亦其族未若貧而安
高枕睡常熟我家雲溪陽歛側數椽屋屋後蒔松韭屋

前種梅竹室中四立壁但有書可讀世故驅我來營此
升斗粟仕不上青雲何如返耕牧頗怪草玄翁乃謂貧
可遂卒歲一布裘終朝一饘粥此外何所求吾生無不
足

用前韻荅黃一翁二首

緼袍敵狐裘晚飯可當肉諱窮竟未免豈不愛儲蓄嗜
利顙有泚恐懼王承福財固禍之媒越鄉忌懷玉君看
座右器已滿即傾覆聖賢用功處清心而寡欲於世淡

無求乃能實其腹誰令入青衫失策混流俗黃子振鷺
姿筆力扛百斛笑人龜手藥欲售先聚族知予頗清苦
應物未圓熟游宦不能巧俯首立矮屋鍛鍊知精金和
寒見松竹自立不堅定庸行徒聖讀誰謂漆園高俯首
欲丐粟窮作扣角歌老厭淄川牧古道寢斷喪時人方
逐逐有田南山南可辦一盂粥請賡歸去來世路早收
足

豆羹采藜藿鼎食厭梁肉士欲齊得喪胸次要涵蓄我

晚頗聞道寧有慧無福外物皆浮雲此道等珠玉閱事
如閱棊已過安用覆回光照諸妄稍稍淡無欲與君共
玄談一笑時捧腹更以詩留貧此語頗驚俗細看首指
盤豈減檳榔斛見金不見人渠輩非吾族君獨臭味同
吾固知之熟平生求益友今日並墻屋不肯凡事錢寧
以君呼竹力學追古人經史費抄讀我方病少瘳擁衲
膚有粟百念漸灰冷有牛不須牧君如汗血駒墮地必
馳逐甘為走跋跋耻作雌粥粥有玉未嘗獻豈憂終則

足

過幕阜山

昔聞幕阜古洞天，偶馳瘦馬行山前。
諸峯却立一峯出，蒼龍墮地走復蟠。
誰燒丹竈汲丹井，絕頂萬丈巢飛仙。
捫蘿攀磴敢憚險，欲往未有一日間。
仙翁見我定拍手，笑我詰曲來人間。
雨淋日炙行路難，何如鸞鶴游雲端。
人生不比金石堅，向來青鬢今蒼顏。
百年富貴草頭露，何乃自苦縻一官。
雖無道骨可不死，亦欲早挂頭上冠。

南山之南北山北築屋翠微高枕眠

平江道中

筍輿踏瘦石揮汗日亭午山斷忽眼明人家住溪澗解
衣近綠陰隔枝鳥相語好風送涼來坐久失畏暑漣漣
一水綠可以浣塵土樵歌響空谷漁艇散前浦丘壑太
寂寥從俗祇自苦征夫問前途欲往空顧佇

喜雨歌

去年夏旱田原枯龍骨取水禾不蘇張顒待哺神所憫

吏既禱之甘雨隨東阡西陌喜相賀化我磽确成膏腴
炊粳釀黍作秋社翁媪醉飽兒孫嬉今年種藝方入土
梅天宜雨還不雨高仰之田龜兆開汚邪亦半無流水
帝從人欲不待祈豐隆擊鼓羣龍趨山南山北起雲霧
雨脚急來如綆縻富家安坐有紅粟田家作苦惟饘粥
丁壯力耕兒飯牛旱時得雨勝珠玉

公檄如蒲圻訊民之食菜事魔者作詩憫之

三代日方中為民破重昏既蝕復光融孔孟道益尊古

禮今則亡陳編意猶存飲燕用觥籌薦享羞羔豚瞿曇
何為者髡首徒實繁不飲非畏義不殺非知仁舉世昏
不悟跣足行荆榛胎禍產妖幻與佛岐又分俗愚有墨
誤吏議多深文怒言必溢惡疑似恐不根黔首亦何罪
可憫不可嗔大道若返古怪說難眩民帝居虎豹守此
語誰扣關

和沈粹卿登南樓韻

鼓角聲悲城上頭沈郎懷古一登樓下臨平楚容回顧

北望神州定欲愁
叫日征鴻雲路冷
嘶風戰馬塞垣秋
人間俯仰更興廢
江漢滔滔萬古流

晚春書懷簡陳巽叔二首

畏病不多酌遣情
時自吟絮飛春漠漠
樹密午陰陰
杜縣今岑寂
微官有陸沉
青山啼杜宇
未斷故園心

二

花片已零落
綠陰遮短墻
園蔬春筍長
官酒臘醅香
揮塵故人少
杜門閒日長
不妨時過我
談笑倚繩床

和廖守岳陽樓韻三首

湖水無波亦蹴天君山蟠結獨巋然未須弔古懷駭客
聊復憑虛揖吕仙霽月光風供笑傲長篇短句總流傳
尊中况有蒲萄綠試作長鯨飲百川

蛟螭旗尾擁樓頭偃仰胡床護一州水濶三江成滙澤
風高六月有清秋長吟不減白蘋句坐嘯能分黃屋憂
凭檻可窮千里目角聲鳴軋楚帆收

清香燕寢憇儒先出對湖山一莞然紅旆小驅聊緩帶

青雲直上且揚鞭肯容坐客同揮塵莫憚行厨費擊鮮
種就巴丘桃李逕不應畫諾更留連

和留獻之出郊勸農

澗翻布穀喚春晴浩蕩花風擁旆旌野老無知須戶曉
長官着意自山行四郊烟火皆新集百里污萊未盡耕
前日惰農今力穡閭閻暇政寬平

和游堯臣勸農韻

傳呼穩凭筍輿行喜見漫山麥浪平道上老農守好語

年來瘦地有新耕
草深黃犢陽坡暖
雨過青蒲野水生
桃李陰中春事好
田家雞犬亦歡聲

到胡道士草庵二首

清風颭颭竹萬箇
白日寂寂茅三間
春深只有鳥呼夢
地僻略無人叩關
豈但壺中堪避世
也勝圖上可遊山
出門回首不能住
輸與道人閒復閒

綠陰啼鳥戶庭幽
解帶聊為一夕留
行李未知何日了
轉蓬方覺此生浮
市朝役役免三窟
今古悠悠貉一丘

得似黃冠林下住何須控鶴上瀛洲

旅中書懷

燕子未歸寒已退海棠半落雨初晴
他鄉異縣見春色遠水平蕪關客情
道路不來黃犬信烟波深負白鷗盟
數竒落在千官底敢嘆儒冠誤此生

到壽安精舍

佛宇崇崇倚翠微萬株松蓋碧相圍
崎嶇短策頻行路盤薄胡床暫解衣
自笑將身為馬走不妨着眼趁鴻飛

枕流漱石平生事却為蝸蠻定是非

歲莫官舍書懷二首

九霄側目不飛揚落在荆湖又一霜
寒日無輝溪水凍春風有信野梅香
少年豪氣今擎斂小隱生涯尚渺茫
歎息衣襟漬朱墨鏡中容易鬢毛蒼

三徑無資出宦游歸心日夜遶松楸
絡頭不盡奔騰志側翅聊為飲啄謀
捉麈縱談無好客捲書獨坐有清愁
陶泓毛穎成何事彈指人間歲月流

聞杜鵑

稻秧出水綠初齊
憶在田間把一犁
留滯天涯歸未得
杜鵑何苦向人啼

野鳧

白水滿塘蒲荇青
野鳧相對浴春晴
背人飛去猶回顧
我已忘機莫浪驚

林監生日

玉融秀參天
人物時炳靈
小春氣候佳
產此千人英
酌

酒為君壽不惟祝年齡君家屋渠渠鶴髮居中庭前有
棣華秀後有蘭芽馨安用執象簡始足為君榮置身瓶
盜間恐損雙鬢青試占眉間黃身間即蓬瀛

留獻之初得孫

藍田美玉驪龍珠天馬之駒丹鳳雛平生眼底未曾見
物以希有為珍竒世間凡子乏英骨狔犬雖多安用為
留侯豐下宜有後更積陰德栽培之大兒斬然露頭角
胸中篋笥羅詩書文章機杼有家法睥睨雲漢思高飛

小兒學語解揖客眼如點漆膚凝脂家庭有此萬金產
何憂門戶無光輝乃翁昨日坐堂上津津黃氣溢兩眉
女奴走報子舍喜紫蘭玉樹生孫枝不須老釋親抱送
此真天上麒麟兒我來欲與湯餅客對翁壽以金屈卮
看渠一歲能識字八歲落筆驅文辭三衢之留世冠冕
公侯衮衮當無疑他年我未髮鬢白已見此子摩天衢

野次欲訪于從周不果因寄二首

見說南山下雲霞好隱居草深幽徑斷心遠俗人踈倚

杖時觀穫焚香只讀書官游無此樂令我憶吾廬

二

佳士不可見清游難豫期此心雖眷眷欲去却遲遲
白
酒應新熟黃梁亦可炊稍閒當躍馬說與主人知

過鳳隱山

落日孤村靜青松一徑斜問程愁客路託宿到僧家
香
鼎生雲穗茶甌湧雪花胸襟添道氣隱几息喧譁

出游郊外七絕

漠漠野田新水生花枝一笑欲傾城
孤村曲塢皆春色
信有東風不世情

幽鳥共歌春意好閒花巧笑容愁多
酒徒詩社俱踈隔
如此東郊景物何

閉戶不知春色佳柳梢欲暗可藏鴉
鴨頭新綠齊腰水
女頰輕紅刺眼花

道上東風掠面輕一犁雨足得新晴
草頭蛺蝶自由舞
林下鷓鴣相對鳴

孤烟近見數椽屋急水時行獨木橋入眼異鄉風景別
脩眉一抹暮山遙

快馬駸駸穿野徑春風處處見山花不須舉首看回鴈
家在南頭天一涯

雲昏山色收圖畫雨過泉聲雜管絃馬上得晴春滿眼
好花迎客亦嫣然

旅中思家

野田既雨水已滿山路無風花自香且復將身供世事

也能隨處對春光絕嫌俗物眼多白未辨生涯鬢已蒼
待看檀梨粗可教老夫耕釣即韜藏

至灌溪予環老二首

春風一路百花開踏遍空山特地來莫道漚麻池水淺
千尋飛瀑吼春雷

食肉定知非虎頸騰身自笑不爲肩相逢莫話青雲事
借我清風一枕眠

環談相

宿野人家

破籬犬吠月將落
曲沼蛙號天欲晴
日出東方塵滿眼
不如歌枕夢魂清

聞蟬

綠陰遮日忽鳴蟬
墮地殘紅色未蕩
兩岸垂楊低蘸水
夢魂時到故溪邊

山行二絕

路回穠綠屢低蓋
風定落紅時點衣
行李馳驅無暇日
客情鄉思兩依依

盡日扶輿度亂山石根古澗水潺潺孤烟時傍翠微起
疑在新安道路間

春日二絕

柳影人家燕子飛東風落絮習游絲欲題崔護桃花句
惆悵春深子滿枝

野花無賴作紅白香力也能來着人古澗寒泉山下路
道人別作一家春

到常清寺予哲師三絕 哲亦徽人

扣闕解后老支郎見我丁寧問故鄉
自說病身歸不得
花開葉落幾淒涼

寂寂松門古道場
暫容倦客拂橫床
老僧欲盡殷勤意
林下春風茗椀香

古井寒泉久不波
豈貪好夢到南柯
夜來雨過宮花落
好鳥留春自嘯歌

晚憩田家二絕

家書未到鵲先喜
春事無多鷺又啼
偶對好山留客坐

綠陰遮屋日將西

山間一徑牛羊迹
林下數家雞犬聲
底事居人苦爭畔
閒田官正募民耕

留山間即事

暫留野次倦征行
差覺山林氣味清
日釀梅酸新雨過
山連空翠淡烟橫
東臯水滿起農事
南國草青回鴈程
撥置文書聊隱几
笙歌一部聽蛙鳴

出郊書懷

扁舟蓑笠寄平生元是江湖一白丁
偶着青衫持手版懶占黃色上天庭
正須每事問三尺未暇對人談
六經啼鳥數聲春事了故鄉回首幾長亭

野次遇雨

木末雲屯飛雨音柳梢水到小溪深
身隨王事有行役家在江南無信音
但得林泉堪著眼莫將軒冕更關心
拂衣何日徑歸去青鬢不禁愁緒侵

酬陳叔裕四首

扣闥倒屣略從容
驚見文章豹管中
水濶山遥俱倦客
花明柳暗又東風
錦囊收拾語皆好
黃卷沉潛經可窮
會看卧龍騰踏去
知賢吾或似龐翁

花枝破蕾作輕紅
漸有春愁入眼中
儻可登樓銷暇日
幸無舉扇障西風
朱絃自奏難諧俗
白璧深藏莫醜窮
樽酒論文期款曲
驪駒催客陋江翁

未能築室隱墻東
偶爾書名宦牒中
羅雀門空無俗物
騎鯨客至有仙風
刀頭雖折故鄉遠
錐末不營生理窮

意欲挽君來酒國接離倒著任山翁

天台遠在浙江東景物應曾到夢中
但有錦囊盛白雪苦無羅襪舞回風
閉門花鳥春心薄隱几詩書日力窮
益友琢磨吾豈敢西隣仙吏有詩翁

上已

莫春放禊好天氣不到水邊流
一杯旋擘紅泥嘗煮酒自循綠樹
摘青梅淹留異縣客多病迢遞故鄉書
不來歷歷舊時行樂處凭欄小立首空迴

過靈塔寺

蕭寺經新雨山間六月清
松梢凝翠滴蕉葉自風生
古塔歸然在僧魚冷不鳴
旅懷多感激高樹又蟬聲

過西崙莊一宿

南首巴陵道籃輿小作程
欲隨王事去頗戀佛廬清
一雨暑欲退四山秋有聲
流年欺鬢髮搖落又關情

酬李秀才

繫馬松根倦欲休
入門解逅得詩流
暑天客裏難行路

莫雨山間便覺秋，共對青燈譚世事。
惜無斗酒破牢愁，黃花可摘吾當返。肯過桃溪一醉不。

湘陰道中

道出昌江險，翩翩馬足輕。
流萍嗟遠宦，行李偶南征。
地帶長沙濕，川通湘水清。
淒涼懷屈賈，天濶莫雲平。

喜晴

雲上山椒鳴竹雞，愁行客路踏青泥。
窮人也得天調護，乞與新晴可杖藜。

雨中山行

暝烟有客投茅舍
春水無人渡板橋
滿地落花愁寂寂
連天芳草思迢迢

春日即事四絕

晚晴鸚鵡自相語
春冷海棠猶未花
把酒排愁先畏病
擁衾作夢欲還家

年少逢春喜欲狂
長年心事易淒涼
胸中不可無今古
坐閱陳編自炷香

著人春氣濃於酒老眼倦看深淺紅只有睡魔降未得
銅瓶魚眼沸松風

小園桃李怯風雨春事一年渾得晴燕子欲相牽率去
踏青吾不敢徒行

雨後繼成二絕

草泥融處墮蔦紅社近寒生雨又風未辦把杯供一醉
花開花落太怱怱

水搖山影綠沉沉雨打花光故惱人賴有海棠傾國色

嫣然一笑解留春

陪留宰游灌溪回飲縣圃六絕

泥融紫燕欲營壘日煖黃蜂爭取花試向靜中觀物化
蒲團相對坐僧家

花暖不勝胡蝶狂松間支徑午陰涼
溫麻別自有春色
鼻觀同參佛土香

樽中歡伯解人意乞我桃皮杏眼紅
一笑勞生那易得
回鞭落日馬嘶風

入眼山花盡笑迎
雙鳧飛處雨初晴
二年踏遍桃溪路
攜酒尋春只此行

高燒蠟炬照深紅
恐負一年花信風
惡客敢辭今日醉
明年別去定匆匆

東風桃李可招客
吏事塵埃能困人
醮甲一杯留我醉
知公胸次有陽春

和留宰賞茶藤二絕

郎官喚客坐花旁
盡日杯行笑語香
醉看綠雲籠暖雪

不知憔悴落他鄉

得酒衰懷亦滿觴
不禁花氣逼人香
醒時忍見風吹盡
玉質溫柔是故鄉

陳推官幽居十詠

彭蠡歸舟

三老檣邊爾汝頗疑居士知
津賴有白鷗無恙肯來迎
棹相親

山堂曠望

俗物令人眼白鈎簾領畧湖山袖手倚楹獨立孤鴻滅
没人間

重湖泛月

四顧水光無際自操一葉輕舟天濶水輪欲墮短橈猶
在中流

星灣晚釣

割据一灣風月棹行衝破青蘋未有霜鱗貫柳注心不
在垂綸

雨後觀瀑

銀漢倒傾波浪玉龍怒挾雷霆雨後遙看更好斬新泉

白山青

松徑閒步

兩行松蓋遮護下有蒼苔地衣試我青鞋布襪支筇却
立志歸

溪上賦詩

閱遍岸花汀草撚髭危坐漁磯一笑冥搜得句溪山爭

吐光輝

林下避暑

灌木膠枝密葉南風細細無聲不用蒲葵到手箇中六月秋清

載酒尋梅

幽花信美如玉不願游人見知喚取麴生同載為春物色南枝

雪中訪隱

寒氣侵凌鶴鬢蒼頭急打柴門鵲把冰枝欲語山人喜
色春溫

宿公安二聖寺

蒙城一市萬人聚一堤如虹作遮護風濤悍怒魚龍宮
瀕流壓以青蓮宇潭潭廣殿不動尊夾立二丈夫士身
楚帆蜀柂日銜尾過者蹴然生畏心粥魚齋鼓二千指
我貧未辦作檀施明朝踏霜出江頭借佛定力扶扁舟
寓江陵能仁僧舍二首

客裏歲月晚春生梅柳枝弟兄嗟別久兒女話歸遲拙
直將安用飛騰敢自期老支剛笑我底事作癡兒

二

容膝非無地安心即是家焚香翻貝葉汲水養梅花無
客同持酒呼僧共煮茶夜寒風力勁誰是老丹霞

夜坐

月白侵衣冷窻閒對一燈淹留歸未得進取我何能空
室無夫女清談只衲僧不嫌身寂寞絕喜睡普騰

復州道中二首

歲事已告畢客行殊未歸
萋萋穿雪長水鳥背人飛
沮洳蒹葭遠村墟烟火稀
邊風吹暮色短策度斜暉

二

私喜歸期近天邊更遠遊
士須嘗險阻吾敢恨淹留
塵事蟻旋磨浮名魚中鈎
春風桃李月倚柂看東流

夜宿江上

夜宿江邊蘆葦叢江流浩浩吼天風
西南關月淡無色

擁衲不眠聽塞鴻

贈李居士棄官為僧二絕

踏破青鞋走四方
年來收脚坐禪床
更無言下商量處
靜對窓間一炷香

遮寒破衲雪蒙頭
笑我浪懷千歲憂
解下腰包只如此
亦無莫莫與休休

雙溪類稿卷三